

四庫全書

集部

欽定四庫全書

集部

古今禪藻集卷二十四

詳校官庶吉士臣謝恭銘

主事銜臣徐以坤覆勘

總校官庶吉士臣倉聖脉

校對官原任編修臣勵守謙

謄錄監生臣蔣繼熊

欽定四庫全書

古今禪藻集卷二十四

明釋正勉釋性通同輯

明七言律詩

曉過西湖

梵琦十一首

船上見月如可呼愛之且復留斯須青山倒影水連郭
白藕作花香滿湖仙林寺遠鐘已動靈隱塔高燈欲無
西風吹人不得寐坐聽魚鱗翻菰蒲

圮橋

子房三世相韓家辛苦推秦博浪沙不上青天扶日月
便歸丹壑老烟霞圮橋進履心長在漢室封侯鬢已華
惟有當時書一卷奈何人世事如麻

贈王使君

君持使節過繩橋已遣蠻夷感聖朝良將未誇班定遠
大臣猶數蓋寬饒川香野馬銜青草雪暗天鷺避阜鵬
西出陽關九千里歸來莫惜鬢蕭蕭

相家夜宴

璧月未出金風涼
羣鳥啞啞鳴苑牆
西山高居帝左右
北斗正挂天中央
繡衣執樂三千指
朱火籠紗十二行
坐待更闌賓客散
蕭齋自炷辟邪香

贈西山隱者

花邊亭子水邊樓
宰相歸來秉燭遊
茅屋道人深夜坐
桂枝明月滿山秋
儘教萬馬千車遠
消得三平二滿休
誰不願持生煞柄
獨誇疏傳有深謀

八月十五夜翫月

無根車轂是誰推不嫁姮娥豈用媒八月正當三五夜
幾人曾賞百千迴旋抽蕖莢初盈數新釀葡萄正潑醅
避暑歸來宮殿冷君王且進紫霞杯

都下春興

陌頭楊柳未全遮青草萋萋帶玉沙才子百篇敷錦繡
帝京三月繞烟花曹瞞叵信劉玄德管仲深知鮑叔牙
自古君臣不虛應分明合曲奏琵琶

余嘗夢至一山聞杜鵑且約雪窓南還

出郭尋春不見春東華踏徧軟紅塵不知蝴蝶化為我
何處杜鵑來喚人荀巖過時惟恐老櫻梅如豆正嘗新
及今無事早歸去莫待秋風江上蓴

梁山泊

天畔青青蘆葉齊晚來戛戛水禽啼一鉤慘淡銜山月
五色彎環跨海霓新摘蓮花堪釀酒舊聞荇菜可為齋
北人大抵無高韻零落梭船傍柳隄

再過圯下懷子房

衮衣有缺爾能縫天遣勛勞刻鼎鐘
太子身令為國本君王手自擇留封
橋邊老父存黃石物外山人號赤松
今夜孤舟載明月不妨高臥想儀容

湖上追憶香山居士

蘇州刺史盡橫金磊落無人似醉吟
為郡三年滄海上畫船十隻太湖心
春歸紫翠鶯花塢秋著丹青橘柚林
山水不隨潮水變直從開闢到如今

病中作

宗泐

十一首

身老那堪病更纏
小齋欹枕祇高眠
階前秋雨連三日
籬下黃花自一年
摩詰不知除病法
嵇康空著養生篇
尚方再賜千金藥
慚愧皇恩下九天

和程續古秋日見過兼次韻

上方高處古禪關
一曲清溪萬疊山
松樹不嫌僧共老
菊花應笑客能閒
西風岸口孤帆轉
落日林邊獨鳥還
一自兵餘行樂少
且須今日盡歡顏

入櫟山寫呈無極老禪

干戈擾擾客難禁
避地來依碧嶂深
亂裏獨驚浮世事
難中多見故人心
千章古木羣峯合
一徑長松十里陰
更欲移茅入重崦
白雲無路可追尋

和張光弼留別

老來心事向誰論
且對青山酒一尊
湖上夢醒思舊將
江西書去問諸昆
可憐漢祖今無廟
還喜留侯尚有孫
手把過眉筇竹杖
與僧閒步出松門

錢塘懷古

欲識錢塘王氣徂紫宸宮殿入青蕪朔方鏃騎飛天塹
師相樓船宿裏湖白鴈不知南國破青山還傍海門孤
百年又見城池改多少英雄屈壯圖

天地無情日月徂鳳凰山下久榛蕪獨憐內殿成荒寺
空見前山映後湖塞北有誰留一老海南無處問諸孤
蓬萊閣上秋風起先向燕京入畫圖

送憲上人歸臨海龍華寺

菊花開日問歸舟三載錢塘已倦游
舊業池臺因夢去異鄉風土為誰留
白雲山寺楓林晚黃橘人家海岸秋
珍重而翁好懷抱幾時同倚夕佳樓

送福長老

五載西行同苦辛扶持老病最情真
千山雨雪獨騎馬萬里沙場不見人
京國歸來天闕近鄉閭去建法幢新
今朝相見仍相別目斷孤雲碧海濱

送徐生之蜀省親

春風初起送江船西上迢迢路八千巫峽波濤通七澤
成都花柳接東川元戎號令飛荒徼公子才華騁少年
遙想峨眉山上月夜深應照綵衣筵

偶作次王以中韻

拄笏高人塘外居作詩直與古人如偶從荷芰香邊得
閒向簪簪節上書白露濕階涼氣早青燈照壁雨聲疎
曉來不署金吾事帶劒承明去直廬

送曹國公北征

上將提軍事北征旌旗百萬出南京直教大漠銷邊警
豈但先鋒破敵營瀚海無水堪飲馬天山有石可鐫名
由來衛霍多勲業從此沙場不用兵

次見心韻送濟上人歸省

萬金四首

苦學不耽春夜眠思家却泛春江船褰衣遠道草頭露
濯足故山花下泉黃鵠方懷少年志白雲偶賦歸來篇
再看入室領玄旨何限天香浮月邊

吳越兩山亭為蕭山尹尹本中賦

單父彈琴宓子賤蕭然作亭尹大夫吳山越山若可攬
王業霸業誰能圖一江潮生白縹緲萬壑雲起青糝糊
自公退食樂登眺只喜政成民力蘇

錦莊漁隱圖為醫士作

錦莊園林錦不如幽深彷彿神仙居舍南舍北賸栽杏
水落水生惟釣魚嚴陵終辭光武祿郭玉素受涪翁書
眼前生意日已廣桃源雞犬同村墟

送王宗禮尚書督漕還朝

尚書持節下青冥
漕粟千艘拱使星
萬里非誇輕海道
一言端可重朝廷
宮衣寵製黃金字
官酒恩沾白玉瓶
曳履不妨頻入奏
聖心虛佇為生靈

陸良貴顧仲瑛過綽墩壽寧寺有作次韻賦寄寺

梁僧繇畫龍點
眼飛去之所

時蔚

禪榻經餘思二妙
舟楫遠勞相問尋
虎頭善畫稱絕筆
放翁吟詩多雅音
枇杷當戶花如雪
橘子帶霜香滿林
招提歲晏肯頻過
莫將清興阻山陰

遊石湖蘭若二首

來復十八首

荷花蕩漾湖水深，上有蘭若當高岑。
客吟時見猿鳥下，僧定不聞鐘磬音。
雨香秋林橘子熟，雲落空澗棠梨陰。
閒來掃石坐竹裏，靜與山人論素心。

五龍之峯雲作屏，雙厓削出芙蓉青。
何人澗底拾瑤草，有客松間采茯苓。
林風不驚虎臥石，山雨忽來龍聽經。
吳王臺榭今寂寞，秋香薜荔花冥冥。

奉寄元璞琦禪師

我昔巢松茂苑東，白雲清賞此心同。
芭蕉樹下吟春雨，薜荔花前立曉風。
亂後溪山誰作主，愁來江海總成翁。
相思欲借峯頭鶴，騎向龍門問遠公。

野軒為海昌李茂才賦

海城車馬往來稀，獨愛寒軒傍翠微。
春雨一村桑柘綠，秋風萬井稻粱肥。
燈前教子惟書卷，座上論交盡布衣。
昨日南鄰邀社飲，醉騎黃犢月中歸。

送徐誠中入關

十載移家住越州聲名早已動諸侯千金不受淮南聘
一騎還為塞北遊潮落魚龍滄海夜風高鷹隼太行秋
防邊有策應須獻好慰蒼生社稷憂

送儒醫陳仲靖歸天台

白髮侯門懶曳裾買山東向赤城居折腰五斗辭微祿
繫肘千金得異書玉洞桃花和露種石田芝草帶雲鋤
也知醫國終為用四海瘡痍待掃除

送呂尚書兩浙運使

虎節光華下九天
鰲臺出使重承宣
御溝柳色新亭酒
官浦荷香醉李船
赤鹵夜熬連萬竈
白糧秋餉給三邊
遥知為政多清暇
細讀夷吾海上篇

瞽者龍翔賣卜養親

賣卜都門養母慈
白頭重際太平時
地生蒼草春雲暖
座映萱花晝日遲
目有神光應內照
心無私欲可前知
逢人但自談忠孝
何必金錢重決疑

聽竹軒為陸隱君題

愛竹閒同阮藉期竹聲遙聽靜偏宜一林蒼雪停琴處
三徑微風駐履時寒帶松濤翻夜壑清隨荷雨響秋池
無聞早已忘喧寂截管誰將古調吹

送張僉事之山西

遥瞻使節碧雲中驄馬西行驛路通水合九河多禹蹟
地連三晉有堯風邊頭露下葡萄紫原上霜清枸杞紅
問俗也知勞撫字可無優政起疲癯

送西域丁鶴年兵後歸武昌省墓

燕雲何處是并州黃鶴磯頭問去舟海濶山長羈旅夢
天荒地老死生愁他鄉寒食身千里故壠斜陽土一坏
為語東歸華表鶴英雄遺骨幾人收

送錢子予新除博士致政還越中

脩髯如雪面如丹芟製新成野服寬湖近季真期卜宅
寺依靈徹話休官霜紅柿葉樽前寫月白荷花鏡裏看
有約沃州騎鶴去臥雲不畏碧山寒

烟波釣客為張道士賦

長鑱懶斲紫芝田，獨向滄洲作浪仙。
半世乾坤孤艇外，五湖風月白鷗前。
菱租歲熟堪為饌，魚膾秋肥不取錢。
藉有玄真同雅調，都將吟嘯寄閒年。

送僕尚書致政歸溧陽

紫誥新題御墨香，溧陽歸老問山庄。
地幽多識雲霞氣，天近還依日光華。
底泉鳴春藥碓竹間風，掃讀書床
從來相業傳家舊，勲烈應看紀太常。

甲寅歲病中述懷

嗒然枯坐竹方床，懶慢無心百慮忘。
雨後摘蔬蒿苳綠，風前曬藥茯苓香。
飛蛾夕掩銅盤燭，餓鼠朝窺瓦缶糧。
幻世有生皆旅泊，歸休何地是吾鄉。

送鄭秋巖知府之青州

江驛梅花映玉珂，都人祖帳動離歌。
六龍馭日南瞻闕，五馬迎春北渡河。
沃野平連燕薊遠，好山青入魯齊多。
明時為政看高節，秋色千巖翠不磨。

次韻衛府紀善危朝璫見寄

爾談東魯我談禪
淮海相聞數暮年
劉向才名遺說苑
楊雄詞賦重甘泉
收來柿葉朝頻寫
吟到梅花夜不眠
早晚定逢濠上寺
三生舊話得重圓

耕隱為南昌萬用中賦

山莊別築楚城西
百畝桑陰水一溪
莎草雨晴黃犢臥
稻花風暖白鳩啼
沽來官酒春祈社
讀罷農書曉灌畦
孝悌力田新有詔
姓名還向御前題

金山寺

曇雲靈二首

崢嶸兩岸市廛開
愛靜人尋此處來
水底有天行日月
山中無地著塵埃
塔擎燈影明雲杪
船載鐘聲出浪堆
自信平生有仙骨
好風吹上妙高臺

山陰舟中

平明飯罷促高梢
撐出五雲門外橋
離越王城一百里
到曹娥渡十分潮
白翻晴雪浪花舞
綠弄晚風蒲葉搖
西北陰沉天欲雨
臥聽篷韻學芭蕉

次韻奉和見心師遊石湖蘭若

妙聲

六首

楞伽峯如九疊屏何年截取匡廬青方同楚客賦招隱
不學山人吟采苓僧蹊盡種苾芻草梵英徧寫多羅經
諸天只在雨花外音樂六時來窈冥

近聞移居湖水頭蘭若下睨蒼波流獼猴夜偷錫杖去
鷗鳥日傍闌干浮揚州月照五湖白洞庭木落三山秋
相望只隔半江水安得贈之雙佩鉤

次韻答沈行恕回京之作

客舍春寒樹影稀青山迎我入王畿雲開雉堞瞻金榜

日射龍章識衮衣御果近從仙苑賜天花多傍講筵飛
聖恩特許魚旬住攜得香烟滿袖歸

遊石湖次韻

黃山高人之所居金沙花明白石渠無錢愛養方外客
有口懶讀人間書采來青菌總堪食種得黃精還有儲
郭西十里不一到題詩為問今何如

題虎丘寺

有客題詩海涌峯高懷渺渺託冥鴻勾吳伯業荒烟外

梵塔觚稜香靄中石坐千人亭可月劒埋三尺水還風
目前無限登臨意古木蒼藤叫郭公

小瀛洲

鰲海晴分五色霞鳳池多隱列仙家黃封日送宮壺酒
青鳥時銜御苑花雲外珮鑾聞步輦月中河漢見乘槎
君王舊聽尚書履回首銀屏隔絳紗

秋日歸虎丘

良琦二首

虎寺共作五年留幾度相攜上小舟楊柳春橋半塘寺

芙蓉夜月百花洲長林放宦閒支遁一室編蒲老睦州
此日獨歸懷往事空山草色不勝秋

次韻答見心和尚

龍門茅屋澗之隈亂後山花只自開數片白雲同散去
十年金錫不歸來月明老鶴啼春澗日落饑鳥集古臺
歲晚相期仍結社西湖賸覓白蓮栽

送仁一初上人遊武林

懷渭

舞鳳飛龍若箇邊天涯送遠獨悽然江山南渡降王宅

風雨西陵過客船
踏雪馬塍春買樹
鬪茶龍井夜分泉
落花寂寞東歸日
烟嶼冥冥叫杜鵑

應制題江東橋

溥洽 二首

西出都門見石橋
虎城千雉共岩峽
浮龜曉渡江流穩
役鵲晴瞻漢影遙
華表月明清露濕
闌干日近彩雲飄
四方車騎多如雨
舉目應思答聖朝

應詔放水燈因賦

持節馮夷向夕過
遠分燈火出官河
斗牛光動天垂野

風露聲沉水息波海族樓臺休罷市
鮫人機杼不停梭
九泉無復悲長夜莫問南山白石歌

應制賦金陵春曉

半間

五雲深護鳳凰城海宇清寧旦氣平
錦繡山河霞彩動
金銀宮觀日華明御溝垂柳雙鶯轉
官道飛花萬馬鳴
試向西虹橋上望分明遐思接蓬瀛

客山陰寄湖上諸友

守仁

六首

蘭亭燕罷送羣賢獨客歸來閉戶眠
夜壑有聲都是雨

春山無處不啼鶯，放歌強挹浮丘袂。
乘興難迴剡曲船，因念少游平昔語。
孤燈相對益悽然。

湘湖漫興寄獵微生

蘭堂客散酒船空，湖上清游孰與同。
五月秋聲梅子雨，一天涼思藕花風。
烟將白鳥沈沙際，雲帶青山落鏡中。
自是儋翁阻杭越，誰教天塹限西東。

題雲門翠微深處

谿閣重重翠崦遮，無時雲氣濕袈裟。
千峯樹色藏朝雨。

六寺鐘聲送晚霞
筆塚天寒收柿葉
茶壇風落掃松花
倦遊每憶消閒地
早晚扁舟向若耶

寄海上令祝良英

堂上琴聲久不聞
江花江草思紛紛
珠光夜淨浮滄海
蜃氣秋高化白雲
漢室將軍雙玉斗
郭家天馬五花文
上書欲叩天王陛
願與吳民借寇君

寄湯德師

月旦曾評物外遊
衣冠合數晉風流
寧知後世非房琯

卻訝前身是惠休黃鳥催人歌伐木青山滿眼賦登樓
多情惟有花谿水不厭年年送客舟

七月十八日重過何氏山林與張守約同賦

南塢新秋穀正花步從真侶入烟霞山林重過將軍宅
天漢初回奉使槎滿地江湖身是客終宵風雨夢還家
十年為說燈前事卻望青雲路轉賒

過彭蠡湖舟中次韻簡見心師 希能

楊柳青青聞櫂歌東風三月放船過山浮空翠濕烟霧

江出大魚吹浪波上疏無因繼嵩璉論詩漫自擬陰何
同叅不負凌霄約清夢時時繞薜蘿

寄見心和尚

元旭

曾共湖山作勝遊杖藜來往更風流一時俛仰成陳迹
千里飄零盡白頭落日青天無過雁秋風滄海有閒鷗
好泉聞道甘於醴安得同消萬古愁

次韻遊石湖蘭若

守道

郡城西來山水深石湖倒浸青瑤岑溪雲十里護僧舍

天樂六時鳴梵音下界塵埃日滾滾上方殿閣秋陰陰
吳王舊跡眼中見萬古事往傷人心

羊祜廟

廟在吳城南

道衍

九首

探環桑下悟前身幼節知君不醜人祇使才謀扶晉室
肯施德澤被吳民荒祠積雨壚生蘚古屋無風壁受塵
今日經過思峴首舊碑剝落淚沾巾

京口覽古

譙虜年來戰血乾烟花猶自半凋殘五州山近朝雲亂

萬歲樓空夜月寒
江水無潮通缺甕
野田有路到金壇
蕭梁事業今何在
北固青青客倦看

再寄王耕雲

鳳皇山下足棲遲
袍笏盈床想舊時
青李朱禽曾有帖
白沙翠竹豈無詩
燒畬藝黍開黃壤
鑿澗分泉貯綠池
却與野僧情最厚
常時來往不相期

京都送雲海上人還山

朝辭魏闕返家林
秋半江南尚綠陰
鍾阜雲歸山寺近

石城湖落海門深僧中不有興亡事世上寧存去住心
此別似難期後會且留茶坐撫孤琴

十月一日金陵發船之北平

石頭城下水茫茫獨上官船去遠方食宿自憐同衛士
衣盂誰笑雜軍裝夜深多櫓聲搖月曉冷孤桅影帶霜
歷盡風波艱苦際無愁應只為賓王

寄虎丘蟾書記

聞道蟾公似贊公一瓶一鉢寄山中雲封蘿屋長疑雨

泉響松巖半是風履破只緣行脚久囊空非為作詩窮
遙思短簿祠前夜共聽寒鐘出澗東

題平坡寺

平坡杳杳挹西湖徑斷樵行敗葉鋪泉落石河聲愈急
雲歸沙樹遠疑無夜堂風靜紆帷幔曉井霜寒響轆轤
那得餘生辭世網捲衣來此日跣趺

舟中送戴伯無還金華省親

吳中山水舊同遊上國辭歸復共舟青邑數家烟火夕

黃河兩岸荻花秋素絃聲帶離鴻慘杜酒香消遠客愁
明日歸家想歡慶雙親華髮未盈頭

春雪寄友

春釀微寒作雪飄化工渾似剪鮫綃雨兼軟軟穿樵響
風颭輕輕到地消粉蝶撲人成隊亂玉塵逐馬去程遙
欲呼鄭谷同吟賞且與隣沽酒一瓢

送王宗禮尚書趣運還京

晏埴

轉海雲濤萬里賒長風指日望京華南州已入諸侯貢

北極初回奉使槎
內宴宮花迎馬酒
御溝官柳拂龍沙
從容好奏安時策
還見車書混一家

秋日送二徒之京

笑堂

客路逢秋意慘悽
吳歌楚些聽如迷
海天一色雁雙去
山月半規猿自啼
心動故園頻入夢
詩因佳景易成題
落霞孤鶩西風外
更向何山問托棲

退隱惠山聽松菴次王達善韻

普真

泉上歸來已一年
萬松陰裏屋三椽
坐殘白日渾無事

買斷清風不費錢，
猿墮山厓尋果樹。
鶴穿林徑避茶烟。
王猷識我平生意，
時寄新詩一兩篇。

南屏道中

永彞

五月雨聲連六月，
南屏雲氣擁柴扉。
林巖有穴山精出，
巖谷無人石燕飛。
詩句偶從行處得，
家鄉都在夢中歸。
朝來杖策溪南路，
新水溶溶沒釣磯。

琴月軒為閔東魯作

玉壺清露洗乾坤，
手拂絲桐月到門。
春蝶夢殘疑白晝，

秋鴻飛盡又黃昏
魄沉湘水終留怨
影落梅花欲斷魂
喜有鸞膠能續響
廣寒歌舞不堪論

曉發

東風卷雨曉雲收
兩岸雞聲送客舟
柔櫓不驚沙上鴈
殘燈猶照驛邊樓
天連野水浮空闊
斗轉銀河拂地流
遙望吳城何處是
青山數點落長洲

為蔡用強題石城山房

石城環繞讀書房
竹色松陰覆短牆
半塢白雲行路斷

一溪流水落花香陽坡牧馬餘春草秋閣然藜取夜光
俊逸盡隨徵詔起祇留後鶴共徜徉

送王希說還姚江和南仲法師韻

吳越雲山兩地情暮年相見五茸城人民已覺今非昔
骨肉難忘弟與兄秋水半陂蓴菜美涼風千里葛衣輕
明朝又作東西別柔櫓聲聲柳外鳴

題梅

羅浮仙子雪為顏一笑相逢大樹間淡抹長烟拖素練

瘦橫落日寫清灣玉龍吹徹腸空斷翠羽啼來夢忽還
彷彿花光三昧手嫩寒清曉到孤山

寄龍井和菴

大同 三首

一從龍井過東州幾度令人憶故丘湖上好山頻入夢
松南古塔獨闌愁春歸柳色開青眼月到梅花照白頭
十載倦遊天上客何時買得浙江舟

寄演福和尚

雨紅烟綠暮春時獨客終朝有所思白水漾沙金錯落

青山浮几玉參差一簾花妥鶯啼緩千里書成鶴去遲
後夜更看湖上月滿懷愁緒散如絲

寄心印法師

山房深夜冷於秋銀燭蟠烟吐玉虬情逐斷流歸浦口
夢隨飛雨到湖頭土苔凝紫花龕靜春草生香竹徑幽
千里懷情殊不惡坐來翻覺迴添愁

分題得朱雀橋冶城送戴司訓

覺澄

五首

朱雀橋成晉武年行人一過一留連豪華寂寞沉秋水

野草淒涼起暮烟
王謝燕來巢已廢
劉郎詩在世空傳
先生此別堪題柱
相與推輪送上天

和杜牧之九日登高

九日登高鴈正飛
馬嘶山郭曉風微
菊花爛漫堪幽賞
尊酒留連盡醉歸
幾處園林澄夕霽
千家簾幙捲晴暉
今逢詩客多才思
不讓當年杜繡衣

雷公晚照

雷公古廟倚嵯峨
風景偏宜晚照多
野鶴巢邊松偃翠

黑龍潭上水生波疎簾暮捲千家雨短笛晴吹萬頃禾
歸到故山行樂處詩成還下夕陽坡

永思堂為朱良玉賦

幾年不着老萊衣膝下承歡事總違每憶深恩流血淚
難將寸草報春暉夢回殘月初欹枕愁對斜陽半掩扉
俯仰為君歌此曲異鄉令我念庭闈

過比干廟

匹馬東風古道傍忠臣此地有祠堂犯顏竟不辭君去

剖腹寧堪為國亡
銅柱沉沙芳草合
鉅橋流水野花香
褒封祀典神猶在
細讀殘碑欲斷腸

遊五臺山次韻

覺同 二首

北來乘興上崔嵬
天外捫蘿鳥徑迴
寒谷未秋先落葉
陰厓不雨自生雷
低懸銀漢星千點
俯視滄溟水一盃
笑指曼殊棲跡處
幾經劫火不曾灰

陪蘇州黃琮遊靈隱寺

攀蘿躡履上丹梯
身在層霄斗柄低
歲久洞猿隨物化

春來花鳥向人啼
蟾宮桂子飄雲外
驚嶺蓮華派竺西
謝客亭邊遺跡泯
年來芳草與堦齊

輓史友桂

本源二首

木葉霜飛五夜殘
薤歌聲斷涕沍瀾
問梅人去山亭冷
釣月船空野水寒
別館瑤琴無復奏
東籬黃菊有誰看
不堪翹首斜陽外
馬鬣新封土未乾

過岳武穆墓

出師頻捷報君恩
十二金牌下帝闈
豈料浮雲遮白日

空懷銳氣復中原湖山共繞千年恨草木長含萬古冤
百戰英雄今已矣獨留忠節照乾坤

和楊主事春日早朝

文湛

三首

西山月落漏聲殘閭闔門開擁百官鶯囀帝城春色曉
燭搖宮扇曙光寒九天韶樂雲中度萬樹仙花仗外看
獨有相如多渴病朝朝清露滴銅盤

紫陽道院和張天錫韻

閒向蓬萊頂上行道人相見話長生巖扉半掩雲霞色

石屋惟聞澗水聲
陰洞草香春走鹿
靈源花發曉啼鶯
如何不見遼東鶴
千古江城月自明

酬周夢椿

故園東望思微滿
目西風客未歸
江上鴻聲驚別夢
天涯草色上征衣
身隨遠浪同飄梗
家在空山獨掩扉
明日一竿滄海去
白鷗應笑未忘機

秋興二首

廣澈
四首

夕陽樓上倚闌時
舉目江湖有所思
薊北山川燕故國

錢塘城郭宋遺基
鴈來不帶中郎信
木落空歌武帝辭
萬里風烟秋一色
杜陵何事不勝悲

長空萬里見秋毫
獨自吟詩向次寥
秋水芙蓉空爛漫
晚霜楓葉盡飄飄
七松處士甘肥遯
五柳先生懶折腰
尚賴四方英俊在
野人空老聖明朝

青塚

淚眼盈盈出漢庭
君王空惜玉娉婷
名因圖畫終難易
怨入琵琶不可聽
天上一輪同皎潔
眼前諸物盡羶腥

當時若賂丹青手爭得胡天墓草青

田家即事

四月農家事事忙曉分陂水灌新秧雞初鳴際爭炊黍
蠶未眠時且問桑處處薰風催麥秀村村烟火焙茶香
可憐賦外徵求急多少饑氓泣兩行

楚江秋曉次沈石田韻

明秀十四首

草寒霜渚夢悠悠衡嶽西風落木秋病裏斷猿司馬淚
吟餘殘月仲宣樓自憐江漢猶遲暮誰採芙蓉寄遠遊

鴻雁一行斜不度水光山色滿汀洲

山川搖落露華晞野寺鳴鐘破曙暉千里人烟江郭靜
數聲漁笛水禽飛寒催刀尺風霜早日遠關河信息稀
叢菊又開身在客長沙誰念未成衣

寄陳句溪

故人病臥寒無氈明月弄影箕山泉自搔短髮向天笑
開過黃花對雨眠海底珊瑚豈無樹床頭瓊瑤知有篇
相然昨夜入我夢握手柴門落日邊

送祚長老還北京

山水南行又北歸，著來寒袖換春衣。
桃花笑雨機先悟，柳絮沾泥錫自飛。
明月一單棲海寺，白雲千里憶京圻。
江東芳草牽詩夢，況值潮生采石磯。

仲秋汎漱湖，董蘿石許東山、朱西村、陳句溪、許九杞、孫太白、沈紫峽同賦。

人物百年滄海上，釣竿裊裊拂珊瑚。
前峯吹笛月在水，中流放歌秋滿湖。
夜靜魚龍迴浦漱，天低星斗動菰蒲。

山川勝槩自今昔天柱洞庭還有無

懷孫太白山人

堦前黃葉堆欲滿湖上白雲閒自來千里秋風悲斷鴈
兩峯寒日憶登臺未能明月同移棹想見黃花獨舉杯
吟徧長松千萬樹南屏落日寺門開

感興用王履吉韻

江邊雨色晚寒輕昨夜柴門水又生桃葉隔溪猶喚渡
梨花沽酒正聞鶯何人得似張平子有客真如阮步兵

富貴浮雲歌一放玉壺還對美人傾

挽淵湛空

淵雲南人終于杭之佛國山

大千沙界空無住坐破蒲團不露機
萬里秋風吹落日
一龕野色上閒扉
袖中山海家何在
世路干戈道不違
懸想精魂似圓澤
葛洪川畔作雲歸

次韻答友

廬山高兮黃河深
短髮素袍仍此心
抱甕真如漢陰老
卜居亦有杜陵吟
寄書鴻鴈秋天雨
把酒花枝春日陰

佳擬殘年載江雪釣舟重為故人尋

嘗茶

小堂春晚正寥寥洗水嘗茶帶雨燒病起不知紅葉老
開門忽報白雲招松邊落日明虛閣夢裏西山度野橋
我已慵書今數月怪來幽思在芭蕉

九日

重陽獨坐西巖雨落木秋風吹布袍聊對江山呼濁酒
自披雲霧讀離騷杜陵白髮窮愁在彭澤黃花想像高

於我慚無一字補朝廷功業有英豪

顧子重陳南賓沈懋學吳天澤九日攜酒勝果山

登高

越王臺上送長歌落日秋風感慨多
草莽野烟諸寢殿
寺門黃葉舊山河
高江舟楫來鴻鴈
絕頂罇罍上薜蘿
此日相逢總陶謝
風流文彩復如何

中秋汎湖

寺門湖水清如鏡
不與遊人照白頭
豈獨尊前千頃月

更憐笛裏滿湖秋
蘋花洗盡香堪把
荷葉拂衣涼未收
此夜瀟湘洞庭上
放歌誰得坐輕舟

甲午歲四月湖上感事

皂蓋朱幡簇仗齊
西湖日月夜歸遲
斷橋豈是長春地
精舍多妨結夏時
朱閣捲簾驚燕子
畫船呼燭照花枝
玉壺美酒民膏血
只有城中太守知

寄徐豐崖先生初任桐城教諭

永瑛

六首

秦駐西邊落日斜
楚江南望白雲遮
草香泮水菁莪雨

春滿琴壇杏子花天闊鄉心傳海鴈官閒詩夢破林鴉
胸中知有五色線補袞終當用帝家

寄劉海村揮使

射策談兵屬老成
轅門文武冠時名
戰袍舊卸團花錦
牙帳新辭細柳營
星斗中宵懸劒氣
江山春日藹詩情
騷壇虎踞誇餘勇
賦就饒歌頌聖明

寄沈紫峽

沈居鄰葛洪
井顏况書臺

三年不見沈山人
江水迢迢悵望頻
細雨別來黃菊候

高風長在白綸巾書臺深處誰相過
丹井西邊獨隱淪
雲木兩峯無暑到不知城市有紅塵

贈鎡可簡住持永祚即歸妙光

寺門鐘鼓動秋山曉日輝輝上竹關
黃葉千峯初出定
白雲半榻又飛還水歸滄海知宗派
花發寒巖識道顏
去住無心隨所遇鑪薰貝葉歲華閒

寄孫白峯

時為江西教諭

忽憶孫登我欲求海天明月獨登樓
高吟尚想西巖雪

一別俄驚八月秋，萬里烟塵悲戍鼓。
三江風浪阻漁舟，何時得共鷗波裏。
薄采江籬慰遠愁。

與隣僧夜坐

草廬溪上淨春花，衲子談玄夜煮茶。
遁跡不逢秦二世，安貧寧識魯諸家。
水風涼薦荷衣爽，山月低穿薜荔斜。
裘馬故人休問及，數函經卷是生涯。

送金豐村侍御兄北上

法聚 八首

錦帆高日動江干，用世寧為惜別難。
多略擬聞新諫草。

一貧應識舊郎官
雲鳬紫闕同仙侶
池草青春夢懶殘
蒼鬢易為憂國短
更須退食謾加餐

西湖次錢學士韻

大隄迴接鳳山遙
金勒東風細馬驕
芳草不知埋帝舄
柳枝猶自學宮腰
天空水月三千頃
春老鶯花十二橋
見說樓船醉妍少
平章獨免紫宸朝

越王臺

越王臺上客登眺
范蠡湖頭草正新
敵國荒涼吳鹿豕

故宮行在宋君臣杖藜遠塞風烟暮花木深城雨露春
往事不須悲落日高歌獨立恐傷神

同豐村兄沈竹石初夏江村泛舟用杜韻

挂席綠陰溪水生桑梓暮雲俱故情白首無何野老在
青春幾負江花明題詩欲扣水西寺問酒復歎湖南城
月明夜久坐不寐吹簫柳堤星斗橫

白溪贈禪友

鷗波十里草堂前水觀明通靜裏禪雲母夜光沉貝館

鮫綃秋淚泣珠淵影空不見雙林鶴香度應知九品蓮
兩岸月明吹笛裏蘆花飛落釣魚船

吳山秋望呈張侍御

子胥廟前江日晡越王城頭雲有無故宮臺榭幾黃葉
南度寢園今綠蕪長笛闌山瞻北固清樽魚鳥傍西湖
蕭蕭落木蒼郊外幾處寒烟破屋孤

禮中峯塔

玉柱峯高生翠寒寶龕丹几一燈懸萬方龍象袈裟下

百億山河拄杖前
幻住早知心已了
活埋猶喜法無傳
辦香合爪春風裏
一夜梅花月在天

石城夜泊

石城山勢鬱岩崑
燕子磯寒落晚潮
雲際樓臺開佛界
水邊巖洞繫魚舠
龍蟠鳳翥留雙闕
草色江聲漫六朝
形勝不磨傷往事
短篷春雨夜瀟瀟

人日

祖福
四首

駕央湖頭春水生
白龍祠前風日晴
梅花作意開自好

柏葉向人殊有情南國十年多羽檄北山此日有柴荆
杖藜物色總春事回首江湖眼獨明

對雨用何仲默韻

城上雲霾朝不散江門雨脚晚猶垂天寒花鳥只欲暮
日遠江湖空自悲芳草山川迷客路中原宮闕濕軍麾
美人何處音書絕寂寞柴荆有所思

九日奉答雲谷見招

招邀已負重陽客乘興應憐此日遊南國黃花仍臥病

西風白鴈重悲秋，久慙龍劒鞘塵匣。且得魚竿伴野鷗，日莫登臺頻悵望。江門落木暗孤洲。

杪秋墨山先生過訪龍淵山閣

晚風江郭動高寒，山閣坐深城漏殘。隔歲酒杯方晤語，幾回秋月得同看。謾言舟楫臨河別，須信風塵會面難。道在滄洲君自適，鷺鷥吾分一枝安。

江上

士墨

春江渺渺春草生，蘼蕪不盡王孫情。青山影帶杖藜遠。

落日光動漁蓑明鷗鷺羣飛下淺渚林原野哭聞孤城
人事時憂不自理長歌清淚時縱橫

春日寄何令升

僧悅四首

梅花溪上見寒松遙憶君家桂樹叢曙色乍開伊闕下
春光猶在宛陽東高吟無那多逢雨短翮何由得御風
歲月依稀黃曲老獨留青鏡照虛空

望寶所塔燈同汎枯舟分賦

塔涌芙蓉寶炬然星河燦燦共諸天蛟龍乍起真珠映

風雨時驚舍利懸浮影半侵隄上水飛光遙隔望中烟
湖山莫辨歸來夜香霧鈴音自一船


唐藩送汪元伯博士奉使還朝

青雲翠蓋促輕塵馬上看山二月春雨色一鞭花外曉
雞鳴千樹隴頭新懽成不擬梁中使怨別空貽休上人
獨有夜來松際月清光猶照宛城闔

弔孔炎宗侯

月照樓臺玉樹殘啼烏夜夜獨含酸魂歸大夢星初殞

名在中原骨未寒
掩淚不堪秦失弔
開絃已絕廣陵彈
今將半偈留君墓
莫作延陵一劍看



古今禪藻集卷二十四

欽定四庫全書

集部

古今禪藻集卷二十五

六

詳校官庶吉士_臣謝恭銘

主事銜_臣徐以坤覆勘

總校官庶吉士_臣倉聖脉

校對官原任編修_臣勵守謙

謄錄監生_臣蔣繼熊

欽定四庫全書

古今禪藻集卷二十五

明釋正勉釋性通同輯

明七言律詩

住五峯答次向九龍韻

佛峒

耽幽喜住碧山中萬疊烟霞隱亂峯
日色遙傳高閣磬潮音初散講堂鐘
焚香靜夜還揮麈下榻魚旬為聽松
海內只今閒謝屐獨憐猿鶴伴仙蹤

咏苔

道乾

翠色遙連薜荔陰
紅塵一點未能侵
沾泥曾上登山屐
帶雨常緣挂壁琴
曲徑蝸涎凝處濕
閒庭鶴跡印來深
青錢滿地從教拾
難當遊人貫酒金

賦得古村贈友

景昂 二首

竹門菊徑綠溪濱
筆架書籤四座陳
舊隱合名龐德里
高風奚減上皇人
秋登場圃雞豚散
寒入園林橘柚新
靜夜宵然忘去住
青燈聯榻重相親

賦得潛西贈友

了翁家住瀼田西，占斷風光花滿堤。
巖桂香浮秋氣肅，江楓紅映夕陽低。
浩歌閒引林間鶴，沉醉猶聞午後雞。
更喜歲豐新釀熟，時邀六逸過潛溪。

九日太史邢公宴集

果斌

山中風景最宜秋，叢桂霏香滿竹樓。
忽訝北扉玄客至，共看西嶂白雲浮。
坐臨小圃苔侵屐，話到真空石點頭。
無那夕陽歸思起，可能明發更追遊。

白鹿

胡總制耀兵越中獲白鹿以獻

方澤

四首

元戎出獵野雲空
白鹿銀騰耀武功
墮角或從瑤水上
食苹應在雪山中
狼歸漫紀千年瑞
雉獻還聞九譯通
何似兩階千羽動
蹌蹌應舞玉墀風

賦得閨七夕

星槎傍月沸笙歌
銀漢仍傳帝女過
烏鵲橋邊重駐輦
鳳凰機上兩停梭
香浮翠幄宵方永
羅結蛛絲巧遂多
自笑空山雲臥者
漫同詞客賦明河

除夜對雪

江城燎火正凝霞
密雪旋迷十萬家
却向鑪邊飛作雨
偶經燈畔落成花
力侵衣絮心同冷
光映窓紗髮並華
詰旦祝禧先有瑞
會從龍象曳袈裟

弔岳武穆

廟門松檜畫森森
風起如聞鼓角音
日月猶懸南返駕
關山未死北征心
雲來朔漠陰長慘
潮至錢塘勢自深
棲鳥似知千載恨
含啼飛度碧湖潯

送林平厓之京

正念 二首

八月高槐樹樹花平橋流水逐溪斜
比來北雁無音問望入南雲有歲華
燈火幾羣鰕菜市朋從何處斗牛槎
酒杯碁局平生事白首都城別是家

蘆洲

八月九月蘆花明大洲小洲風露盈
舟人漁子自相向江吟岸笛時爭清
當軒襟帶鷗鳥近亞席燈火魚龍驚
直看玉樹過千尺長使蒹葭左右橫

答友惠菊

圓戒

空山搖落閉門時，忽喜餘芳寄遠思。
雅質向人渾欲語，寒香繞榻訝催詩。
神超色相元無染，節抱風霜益自奇。
愛爾乞歸陶處士，白頭三徑結幽期。

龍南山中喜恒吾衡石過訪

圓珂 二首

扁舟出郭北風寒，入社還尋貝葉看。
過去道安終莫及，再來何遜見應難。
未忘月影先忘水，只愛梅花不愛官。
麟鳳此時雖得意，漢家肯放網羅寬。

朱石門何恒吾泛雪而至賦贈

玉人歌扇撲楊花
門外時來問鹿車
凍壑偶攜雙杖入
寒梅共折一枝斜
心安慧可曾忘臂
興盡王猷欲返槎
此去不知東郭履
明朝踏雪過誰家

重登南張祠感舊

圓理 三首

蒼龍橋畔暮維舟
斜日荒烟欲喚愁
華表更無歸鶴下
廟門空有斷碑留
笙歌幾處來青舫
鐘梵何人對白鷗
重倚回闌覩陳迹
却憐身在夢中遊

輓月泉聚禪師

聞說天池罷講幃
獅林從此大音稀
天花自點跏趺石
谷鳥猶窺補衲衣
澗底月來空有像
幡頭風動寂無機
從教語落諸方去
惆悵令人對夕暉

春暮彭冲溪徐玄嶠項少嶽嚴少渠過翫雨中壯
丹分得芳字

尊俎臨軒午正長
數枝留得雨中芳
空餘興慶池邊色
不是平章宅裏香
雲捧髻鬟嬌欲墮
膩流脂水淡成粧

品題獨許陰何輩揮灑爭傳寡和章

謁文太史徵仲

戒襄

先生曾作祕書郎三徑歸來鬢未霜
江海有心懸魏闕烟霞無夢入明光
吳城白酒春長醉茂苑黃花晚益香
獨向門牆窺藻翰晉家墨史漢文章

留別龍華月清上人

德清八首

樹下逢君已廿年眼前四世總如然
此心直入雲霄外往事都歸幻化邊
筋骨縱銷肝膽在關山雖隔塞鴻連

分携莫灑臨歧淚尚有龍華未了緣

南州張相國丁大叅回舟中述懷

江洲芳草正萋萋已到津梁路不迷
萬里乾坤孤杖外片帆風雨大江西
顰容踪跡同魚鳥終是形骸似木雞
遙望五湖煙浪闊不堪回首白雲低

信宿鼓城洪福寺懷達觀禪師

有引

余弘法罹難蒙恩貶竄嶺海辱達師北走視余久遲
此間及至師已買舟南矣余信宿於此感而賦詩

天涯何處問同遊
津濟先登彼岸塵
世大都俱浪跡
乾坤從此任虛舟
懷人夢徹三更月
去國心懸萬古愁
百戰場空衰草徧
黃河不盡水東流

端州慶雲書院懷制府大司馬陳公

花宮高倚七星傍
門對江流萬里長
桂樹婆娑寒自影
珠璣錯落夜生光
山圍城郭森如戟
月照庭除白似霜
回首蓬萊天際遠
不堪道路滿甘棠

奉贈制府戴公累捷特進大司馬

幕府霜威鼓角清
彤弓元自重專征
夜郎初拔蠻夷壘
瘴海旋收草木兵
掃蕩幾空封豕穴
招徠連築受降城
懸知早晚趨丹陛
帝識尚書曳履聲

甲辰曹溪奉臺檄還戍

十年混跡走風塵
著處難容自在身
擬向深山尋鹿豕
翻令下里厭陽春
誰知瘴海從戎客
倒是江湖沒事人
莫謂塞翁悲失馬
從來禍福未堪論

祕魔巖

羊腸百折任青藜
草莽蕭蕭仄徑迷
絕壁倚天應隘日
斷崖無路只飛梯
依人野鶴尋常下
逐客山猿日夜啼
自是烟霞隨去住
到來元不費招攜

登凌霄峯絕頂

獨上高峯倚杖藜
侵人空翠轉淒迷
西來二目如鵬翼
東去千山似馬蹄
巖壑久稱獅子窟
山林終許象王棲
吾來欲說無生法
塵尾纔揮萬象低

九日友人約登高阻雨

希復
二首

聯翩鴻雁下寒塘不道西風遽已涼客有窮愁關晚節
菊無嘉色豔秋陽侵燈細雨窓交暗匝樹濃雲水共長
此日登高空我望籃輿那得出柴桑

送尤六村赴河南潘陳州之招

千里辭家問故人路岐不憚朔風頻心銜潘岳稱知己
夢入陳州似比隣江色遠浮霜嶠冷雁聲初動稻梁新
一觴出祖非專別為訂歸來及早春

送趙仁甫扶父櫬還閩

真謚

四首

遊絲撩亂落花時送客西征悵別離詎謂藏舟連壑逝
那堪扶櫬入閩馳淒清夜月猿啼早鳴咽春流鷁去遲
禮戒過傷應自惜不須苦誦蓼莪詩

送黎太博擢黃安令

餞別離筵繡水西垂楊繫馬只頻嘶雲將飛鳥懸青漢
天賜除書帶紫泥墨綬生香江草綠春風入楚縣花齊
郎官舊有名湖在公暇能無一品題

奉送龔郡侯入覲

何人不說少卿賢
解劔民風望自偏
五馬如雲馳禹甸
孤心捧日覲堯天
彤墀肅穆鳴珂裏
玉殿綢繆曳佩前
虛席定應勞聖主
蒼生遙待賜金還

將之金陵答姚山人叔信

浮身踪跡似飄雲
此別寧愁落葉分
未到西山尋古寺
却逢白月話離羣
荒途拄杖橫烟水
逆旅簞瓢挂夕曛
帝里得逢猿鳥便
尺書那惜寄徵君

同諸君集鳳凰臺得中字

洪恩
八首

紫鳳青蓮足並雄登臺猶想異時風山開晚霽收殘雨
日射寒烟挂斷虹疇昔齊梁詞較靡當筵枚馬賦偏工
蕭蕭落木無窮思六代豪華感慨中

贈朱處士

閨戶常多載酒徒北窓高臥著潛夫弢中矢下聊城約
袖裏鉗驕晉鄙符滿架琴書供嘯傲到門松菊豈荒蕪
長安自愛韓康隱何事扁舟去五湖

枕流閣為吳幼安賦

青溪曲曲柳條條小閣琴書慰寂寥
鍾阜雲來春帶雨秦淮月落夜通潮
觀風上國唯尊魯洗耳中流豈避堯
南郭東山相映發不須重憶武陵遙

曉發箭闕

臺榭參差出萬松海門初日上高春
石穿乍可緣飛騎箭闕齊諧事祖龍
半嶺雲生空翠合滿林花散曙烟封
因貪隔岸湖光秀行盡春山七十峯

登淮南懷柔閣

向洋新漲一登樓雲裏飛湍挂碧流不為釣磯思漂母
空餘殘壘說韓侯傍淮野色寒相映近海明霞夜不收
信美懷柔終異土平原無限夕陽秋

重陽前二日姚使君招集綺霞閣送吳叔嘉北上
刺史招攜興不孤觀風吳季酒頻呼未逢九日酬黃菊
且對千山進紫萸閣倚西南當勝地江盤東北下長途
知從燕市尋豪俠豈問金臺築有無

元旦

蓮華峯下雨安居昨夜人言是歲除齒髮有衰過半百
山河無改只須臾風疎梅萼香仍結雨洗苔茵翠欲舒
石上寒松閒倚杖相隨流水出行廚

秋日過吳氏經閣

誰向空門學布金新開龍藏樹祇林衣裁薜荔頭陀製
人類蓮華不染心旂影到溪成梵字經聲出閣總潮音
氤氲細細靈香散識得諸天莫外尋

寄雲東

法生

十年滄海共離羣三月風塵信未聞芳草閉門春冉冉
落花啼鳥暮紛紛歲華江上看流水世事人間喻薄雲
鴈宕天台何處所采芝捫葛幸同君

新柳

智舷四首

謾說隋堤鬪早春還應妬殺楚宮人一時看去青於眼
幾處愁來翠欲顰夜雨尚憐勝不得東風只管舞教頻
更堪亭外旋攀折那有長條拂水濱

送友

去年九月辭山徑是日迎霜葉盡飛預採蕨薇為旅食
更裁薜荔作征衣芒鞋整後猶沾蘚隣舍行時為掩扉
春仲煩君到湖寺梅花開過柳依依

其二

煮石樵青隱鹿田毀垣破屋住多年微吟看落松邊月
閒坐聽飛竹外泉何處世間堪遠客誰家林下接高賢
知君雖未還山竇肯放塵游野服前

送谷響入匡廬

飄然汝去躡何峯六月匡廬雪尚封芒履不妨江路草
淨瓶將挂石門松雲開嶺外逢僧影日落巖前見虎踪
聞道遠公蓮再發須知元不異禪宗

春日寄贈屠長卿

德勝八首

縱謫人間氣色豪何須獻納白雲曹文章一代老青鬢
日月雙精奪彩毫夜雨夢醒吳地冷春風望斷越山高
河沙藤葛忘言話一轉何妨片語勞

臘日對雪得表弟虔州書答此

鼻觀寒林滿雪香
忽驚遊子戀他鄉
梅花寂寂枝空白
楊柳依依葉故黃
萬里封書來震澤
一宵飛夢過潯陽
虔南越北論兄弟
兄自晨參弟自商

落花流水

落花流水自春秋
冷看人生暗白頭
齊相不知稱後裔
漢家何事在前籌
年華漸去真難挽
風月時逢只暫留
所以貴他賢達者
不將身世事窮愁

病鶴

林公不鍛總難飛玉砌瑤階伴侶稀
曾是緱山仙跨去那容華表病來歸
清霜瘦怯丹砂頂明月寒生白氎衣
倦翮暫教棲蕙帳九霄無用戰能肥

答道可佛可八月十八日同諸友人海上看潮有懷之作

滄溟八月大風高此際還能念鬱陶
避世真應慚爾輩望洋空擬向吾曹
五山徒步齊羣聖幾錫聯飛駐六鰲
何處得來龍領物開緘猶帶海門濤

讀近時諸名家集有感

普天無事日謳吟誰道新書事若林貞烈偏多生繡閣
忠良不盡出黃金人人卿相歸田老處處將軍入虜深
競有文章攻左馬也應微念董狐心

寄題芙蓉窟

高陽池館遠嵯峨問道芙蓉窟裡多霞暈越溪晴浣水
月明洛浦夜凌波渾驚玉女笑開口忽訝天孫偷渡河
儘著容華曾不忌楊家姊妹奈君何

友人園居咏梅花

千樹梅花鑿石栽，枝枝相亞玉徘徊。
野人不作羅浮夢，地主何如水部才。
自恐飄零呵凍折，若為衰老寄春來。
杖頭多插殊無恙，歲歲年年訪雪開。

過金澤寺次韵

福聚

祇園蕭瑟建何年，徑轉松蘿慘暮烟。
堂上久無談白法，池中猶自吐青蓮。
數聲清磬出林杳，一點孤燈耿夜懸。
不有支郎肥遯在，那令此地得隨緣。

冬望

慧秀 六首

倚杖高原白日斜
陰風獵獵起江沙
草枯平野來輕隼
葉盡孤村集亂鴉
映郭暮雲全似雪
隔峰寒燒半成霞
誰家茅屋臨溪住
門掩庭梅一樹花

春晚覺公具舟邀到王太古遊惠山時寺新燬

舍筏春郊步履輕
風流支遁愛山行
雲連錦樹花齊發
火滅金田草細生
石底寒泉供礪齒
枝頭慧鳥若關情
王珣佞佛心偏重
落日空巖禮化城

行藥梅花下

病裡逢春劇可憐
梅花開徧石闌前
淡因日上微矜色
瘦恐風吹不駐年
靜愛寒香浮藥椀
遠驚長笛度江烟
淒涼此際巡檐索
默默相看病入禪

小姑山

江中片石障彭湖
翡翠衣裾像小姑
九派洪濤香澤水
千秋明月晚粧圖
嬌非行雨通君夢
神自分風任客呼
過舫可能無顧盼
莫教烟靄便模糊

竹間聽反舌鳥

細靄輕嵐散竹林，
揅頤小坐聽晨禽。
未蒸花氣機偏澀，
乍寫春聲意獨深。
緩引易調多種舌，
瑣言難竟一生心。
何如隱忍過殘臘，
末路風烟恐不禁。

金山

江天樓閣映蝦髯，
獨慮清寒不慮炎。
霞散雁王開寶藏，
月來龍女抱香奩。
蒜山風隱漁舟集，
瓜浦潮迴水怪潛。
烟景飽看禪定後，
此生綏福恐難兼。

雨夜有感

法濟

寒林疎雨夜瀟瀟
獨向松窓坐寂寥
隣燭有光難借照
庭花無實果何聊
年華竟逐東流逝
鬢雪那教烈日消
聞說沃州山可往
駕言歸去是明朝

得養性書

故人寄我白雲牋
夢裡身談去住緣
萍散偶隨鷗浪遠
松高難免兔絲纏
亂猿晚嘯千巖月
孤鶻秋橫萬里天
懸想已知湖海味
歸來看取在山泉

聊齋詩為譚梁生

圓信

掃除蓬徑延清壑茅屋竹椽非世情湖面香輕荷葉放
山腰澹去樹烟生兩峯斷塔山流影一檻新紅春醉英
詩酒百篇償宿債雪音曲曲被華纓

季弟憶母有作代母次韵答之

大泓

白髮毵毵病骨寒朝來扶杖倚門看風吹柳絮驚春去
月落堦除忘夜闌萍跡難縫遊子綫夢魂空識仲由冠
一從暗擲金錢後鎮日依依少進餐

五臺山折斗峰

斯學十五首

樓臺蕭颯雪巔峴襪被來登六月寒古殿西風吹鐵瓦
長空北斗挂闌干太原山遶中條近小有天通上界寬
欲向陰厓振鳴策恐驚林下黑龍蟠

還山答姚叔祥

桑乾會渡大河渾萬里歸來海上村姚合詩名從正變
賈公禪理豈旁門深秋落葉青山晚近寺寒潮白日昏
五濁世間悲未已試拈游道與君論

丙申春日沈士英為我寫照賦贈

梅花千樹曾相訪風雨孤舟復見尋
草坐麻衣空有相巖棲雲物總無心
禪兼繪理憐摩詰貌得冥觀媿道林
今日分身應別去三洲一鉢是知音

送姚叔祥從沈開府入秦

潼關萬里度征人馬首蕭蕭不見春
已逐塞雲過隴漢更驅朔雪下岷岷
劒花夜幕占軍氣檄草寒原散戰塵
自是馮郎憑軾意五羊何事欲干秦

姑蘇懷古

客遊春艸暗天涯
晚色楓橋繫短槎
泰伯廟荒惟古木
吳王臺廢自昏鴉
風迴沙岸潮初上
雲度山城日易斜
滿目興亡千載事
不堪惆悵對江花

送徐君實林居

齊女城頭日欲曛
戴顓宅畔一尋君
南州几榻花陰下
東壁圖書夜色分
刻漏儘催池上月
袖衣堪臥石邊雲
小山久已聞招隱
桂樹青青白鶴羣

過陳泰初讀書霑雲寺

山中芳艸欲生庭有客移舟江上停
一水到門容問字
千花擁帳過談經
維摩對處開禪月
太史占來聚德星
今日津梁疲臥者
賴君物外眼雙青

屠長卿儀部過山

海內憐君故倦游
家徒四壁茂陵秋
拂衣豈戀青山臥
擊劒空令白日愁
萬事塵埃歸放達
千金詞賦足風流
相逢蕭寺蓮花晚
更乞明珠照沃洲

自適

天風吹帶倚長松
落日臨流見遠峯
塞外何心窮失馬
人間無技學雕龍
僧來黃葉鳴秋錫
鳥散蒼烟起暮鐘
夜淨沙頭涼可適
月明一片白芙蓉

寄董玄宰吉士

十年清譽下帷聞
晉室風流漢代文
匣內雙龍偏吐色
人間萬馬欲空羣
鳳池彩筆春烟散
祕閣青藜夜雨分
韋杜城南天尺五
懷君芳樹有停雲

別陳叔灌

曾記空山對雨時
論交已是十年期
筆花照夜神飛動
衣藥驚秋佩陸離
傳舍有魚長缺在
故園無雁尺書遲
蕭蕭燕市臨風別
脉脉何勞問所思

郭外次李環衛遙字

連錢寶馬綺塵消
出郭方知遠市朝
大塊不迷羣聖轍
小山應為八公招
臨風野鳥當歌起
帶雨巖花愜賞嬌
題就鶴書那可寄
西方落日美人遥

送李白甫歸吳門

同病秋風吹客衣
臨高其奈送先歸
劒歌燕市千金盡
帆指吳門匹練飛
黃葉初來南國雁
白雲應老北山薇
知君家在滄浪曲
依舊寒星繞釣磯

送何侍御謫武昌

一去江湖自有星
三看楊柳映都亭
驪歌別酒分燕市
雁影征帆過楚汀
報國烟霜孤劒白
接天雲樹九峯青
湘南從古多才子
詞賦還應問獨醒

過強善長山樓題贈

城上山光半入樓
翳然林水即滄洲
淋漓醉墨花間雨
蕭颯幽情竹裡秋
白日風流消蠟屐
清時雲臥卜菟裘
僧來飯罷還移坐
貌得生公石點頭

留別李越石

如愚四首

我去君留計不同
含情人逐路西東
秋高霜落依城樹
日冷砧催出塞鴻
息影自當丘壑內
全生惟在斗升中
風塵此會知何地
攜手臨岐歎轉蓬

同友人讌集王雲澤少保園林贈執之任子并懷
少保

尚書府第即園林公子邀歡興更深向日黃柑三寸摘
當風綠蟻十分斟湖光欲暮雲鋪雨天色將寒霜傲陰
潦倒嗟余方外客濫叅八座盍朋簪

同郭仲甫游禹門宿王元執懸榻處

深更共擬宿王家小閣青鐙映絳紗奴子畏寒燒豆蔻
主人憐客詠蒹葭霜高色萎先開菊城近聲喧後至鴉

一榻久懸曾未下今宵全許借袈裟

方康侯孝廉見過談及金陵舊隱

江介茅菴榆柳環矮籬深徑門常關煮茶正熟來新客
作揖未完問舊山浴鷺梳翎求日曝虛舡攪漿背風灣
野烟荒景非佳趣贏得樗庸遠市寰

過本覺寺三過堂

本中

文公蘭若接村墟滿徑蒿萊歲月餘塔涌寶光含舍利
池涵新水浸芙蕖疎林禽語和清楚古壁蝸涎學篆書

寂寂空堂無過客去來今事總成虛

送夏少尹還古棠

明曠
五首

風塵跋扈見君豪別賦兼秋轉自高傲骨一生堪鶴馭
雄心多半付漁舸芙蓉澤國經霜老鴻雁江淮過雨號
千里送歸楊子渡懷人空復戀綈袍

秋日同吳公治明府沈孺真沈稚圭沈伯龍李莫
勝郭張虛諸丈結社大雅山堂得書字

竹掩西園引鹿車傍城丘壑混樵漁霜蕪半蝕林堂屐

風鐸時侵石几書白社多情高士駕青山無恙道人裾
不緣湖海成嘉會那得驪珠薄紫虛

送郭少叅之晉陽

西風千騎散驪歌綉轂朱轡動綠波攬轡清秋窺澤潞
揚帆明月下滹沱漢臣薊北誰為重國士江南爾自多
屏翰闢城功奏日可能無意問巖阿

雪望懷社中諸友

朔風威發鴈徘徊江雪無端入望來澤國孤城冰是檻

祇園高閣王為臺萬峰晴色驕天地幾處寒梅破草萊
同社故人都不在夢醒蘭舸剡溪迴

登禦兒城

徙倚荒城萬里思西風蕭颯不勝悲村連古渡山初斷
日落中原鳥去遲雙樹高僧文喜墓千秋舊主越王祠
愁來天地蒼涼外獨立孤雲莽自馳

憨山師自嶺南寄楞伽新疏併書賦答時大師以
弘法罹難廢席遣戍

法杲

七首

師于熱海放慈航丹微朱厓信渺茫天意逆扶金策杖
君恩翻賜鐵衣裳山迴象景風烟黑身倚蠻方日月黃
今夕短戈聊當錫蓮花猶在舌端香

冬日答秀公見寄時公挂錫婁江王太史恬淡觀
刺血書雜花經

碧海蒼山各僦居弟兄踪跡近何如三秋逐日貪鴻雁
幾夕臨江弔鯉魚極口鹽酸衰世味滿心寒熱故人書
翻天直是波瀾急不信浮雲點太虛

寄潤兄二首

探竒選勝杖初歸，歷歷青山澹晚暉。
平楚月高鷹隼落，渡江人盡鯉魚飛。
風搖赤地喧柴戶，露響青天濕草衣。
翹首碧空雙送目，雲川不極樹微微。

雲門落落澗淙淙，墮地青鞵冷一雙。
四塞草光迷下界，百年峯影挂西窓。
山中鞭石天羊醒，心際凝灰野馬降。
曾詔紫泥呼不起，至今人物斷滄江。

春日寄潤兄

南北飛騰野鶴蹤灑然身外一孤筇無家剩我三千界
有地輸君七十峯花鳥昔人徵木偶天羊此日驗樗庸
凡夫日見湖雲黑不道春山有伏龍

佳處亭望金山

迎風獨倚最高臺漠漠平沙孤嶼開短塔正如看水立
危峯爭欲渡江來于時白浪千帆下何處青天一鶴哀
興劇不知歸路晚淡烟斜日滿蒿萊

挽寒山坤禪師

幻海蒼茫路杳冥萬竿風竹冷荒亭
河神力擁千花塔
門弟親傳一芥瓶
亂木曉牽春霧白
遠峯寒被夕陽青
回頭恨殺楓橋水
鳴咽留人未忍聽

遊曹溪

如能

迢迢一徑到曹源
滿目烟蘿寂不喧
澗底水隨黃葉度
門前松帶白雲屯
秋風斷壁尋身迹
落日寒巖見膝痕
禪客空懸千古意
南宗今欲就誰論

山居詩

契靈 六首

愛住深山懶更便日來猶未得高眠
供爐黃葉雪前掃就榻青松雨後遷
筓地牽繩防免折櫻林響柝畏鴉穿
道人碌碌何多事也要消磨粥飯錢

疎密藤蘿亂石墻帶根松柱竹梢梁
已無素壁粘名畫却有磁爐然異香
甕牖封沙經宿雨簾簾穿綫漏斜陽
鬚長髮短樵夫樣草索編衣榭葉裳

好吟何必索枯腸春燕秋蛩事事忙
若是胸中銷磊塊自然筆底露鋒芒
野棠綻處山如畫岸菊開時月似霜

文字欲離離未得臨池又覺墨花香

獵火樵蘇自一村危溪畧約引楓根桐陰滿路僧歸寺
雪晝無人虎到門栗破秋原奔稚子笋行新土領兒孫
窮年不耐尋經論活計唯須藥餌存

輕衣薄牖覺春寒紫蕨青芹不厭餐落澗松聲風裏聽
過橋山色雨中看前村竹好常留坐隔塢僧閒每接談
惟解溪清堪照影不知滄海是波瀾

來日何如去日長新年猶說去年強不愁髮有幾星白

且喜身無半刻忙紅燭暗銷松葉火玉梅初點雪花香
蹉跎四十明朝是漸覺雲林生曙光

維揚道中

廣化 三首

短亭楊柳夕陽斜烟火寒城十萬家駐錫漫同人駐馬
浮杯莫訝客浮槎淮南水足千堤雨江北梅遲二月花
長愧青山未歸去又驚春色在天涯

登鳳凰洲大士閣

一簾秋水浮高閣雲自何來拂我衣西郭殘烟荒萬井

東湖寒月淡雙扉獻珠有女乘潮去乞食何人買渡歸
漫說風波門外險溪山隨地好忘機

輓藕花社主

彈指相逢二十年白雲無恙主人賢寒鐺煮水經千帙
破壁分燈屋半椽去住儘期禪社後死生真愧劫春前
感時還覓開山事集有蓮花鉢有田

有藕花
集行世

題錢康侯春水宅

通凡七首

誰謂浮家不稱奇幾人乘興學天隨每移沙上鷗邊月

偏泛斜風細雨時
河漢有無逢
織女烟波曾否載
西施
明年好向武陵去
春水桃花莫負期

阻風平望道中聞笛同王道安諸侶賦分零字

濕烟千頃壓江汀
簫鼓東來亦暫停
柳葉抱風垂古渡
草光含雨傍孤亭
欲將杯渡同僧日
謾道乘槎是客星
試問漁人吹笛處
桃花能不怨飄零

焦山懷雪浪大師

雨餘江色吐晴烟
柳外千帆背日懸
極目不禁淮甸草

乘潮欲上楚人船
雲萍故擬終行腳
巖壑那堪負息肩
相憶況當春又晚
幾看花落別峯前

善財石石對海門在別峯下

亭亭孤立大江湄
烟水迢遙影共移
一往便知行腳事
相逢幾誤點頭時
海東明月元相照
沙上閒雲似有期
人在別峯長寂寞
機緣休道向來遲

病鶴詩為范君和賦

詢汝何年至雪廬
蒼苔日日長堦除
總知未病頭先瘦

豈是無糧肉漸疎
霜月夜深形影澹
松風林下夢魂虛
若為不復思遐舉
因共墻東隱士居

朱竹為王伯玉賦

碧玉千竿且謾誇
別教一種在王家
棲來丹鳳同寒色
化去蒼龍帶曉霞
雨氣乍浮湘女血
淚痕時染蜀江花
傍人遮莫驚桃杏
霜雪相依遣歲華

秋燕

雙雙秋燕自相呼
短砌疎簾日未晡
應有鄉心隨海月

豈同沙雁倚汀蘆歸途不避霜天冷舊壘空留夜色孤
最是江南棲息久烏衣得在夢中無

金山寺

明賢二首

躡險耕雲作浪遊蓬壺不遠帝王州樓吞海日雁橫下
地涌江村石倒浮千里風濤生枕上一天星斗挂山頭
居僧自說烟波淨帶月歸來不繫舟

題楊文襄公鴻鶴山莊

歲久浸沒屬之他氏
其孫韜甫恢復故賦

曲曲清溪面面山虎臣曾此結幽關晚松猶見大夫節

春草不凋丞相顏欽命久辭黃閣下疎鐘遙度翠微閒
臺階剩有白雲意欲迓隣僧來話閒

消夏灣

大壑 三首

拾嶺何曾惜病軀名山次第出平蕪已無宮殿凌千嶂
尚有峯巒匯一湖寂莫到來堪淨業豪華銷盡識雄圖
應憐隔歲期逃暑綠樹薰風興不孤

自涵村渡橫山宿僧舍

天涯朋聚興翩翩村黑波昏亦放船攢島百家寒隱寺

面湖千樹晚藏烟
露浮竹葉僧先醉
霜落蘋花客未眠
預想詰朝吳市裏
夢應隨月遶峯巔

繇碧螺峯經柳毅井至豐圻

碧螺峯頂徑縈迴
暝色延波落日催
百粵層霞臨海動
五茸片雨拂湖來
浮家遺策空寒暑
廢井沉書獨草萊
料得吾儕機事盡
羣飛鷗鷺不須猜

送本無禪師謁五臺

廣莫

二首

出門芳草路漫漫
驀直曾參婆子禪
塞上風塵雙白足

杖頭蹤跡半青蓮
重巖雪積僧初定
古寺春深花欲然
若問曼殊行履處
寒山寂寂水漣漣

郁母挽詞

郁母曾諳湛氏儀
流光不與世相期
機梭靜院閒終日
兒女寒窓空所思
花影亂離人獨逝
鴈行縹渺月初垂
含情最是墳前土
猶恨秋風落木時

六月懷石梁

如曉
二首

寒落江城動客心
不勝炎酷憶東林
樓開雙澗飛泉冷

榻倚孤峯積翠深
畫靜溪雲低竹色
夜涼蘿月散苔陰
烟霞不識人間暑
自別青山夢欲尋

留別丁文統及社中諸友

河橋新雨長春流
軟軟東風欲放舟
行李不多堪自負
交情無限向誰投
幾年踪跡羈如夢
半世浮沈浪似鷗
回首淒淒江上路
綠楊芳草繫閒愁

孤鶴

方擇

耐可秋風拂縞衣
淒淒弔影欲何依
自看野骨天生瘦

獨舞空階客見稀
碧海有家寒不夢
青田多侶病相違
由來不樂乘軒寵
只漫昂藏送落暉

孤鴈

風寒澤國不勝哀
雲外還呼舊侶來
片影乍迷秋雨暗
一聲初斷暮天開
已從塞北先相失
縱到衡陽也獨回
岸岸蘼葭深可宿
善鳴亦恐有人猜

秋柳

經春徂夏幾攀條
此日看來半已凋
谿上陰稀門不掩

笛中聲斷思無聊從教涼露朝朝下耐可西風樹樹搖
剩得踈黃如許葉依然臨水拂平橋

秋仲道可為海上游余有徑山棹臨別各賦

德彥 二首

我往西山君海東人分山海調還同風迴海水遙天動
雲落山光大壑空病骨不辭穿鳥道詩囊或恐借龍宮
莫因天畔生離思眇小乾坤慧眼中

同友人登松風臺禮竹菴禪師塔次韻

蘭若雲深曲逕迴強隨大朗謾登臺溪山不盡吟邊色
身世應憐劫後灰古樹寒聲吹客步孤城落日帶禽來
塔前高碣君休讀涕泗臨風拂未開

自中臺至西臺

行志二首

步隨蓮瓣轉溪東滿屐微香颺曉風有客總遊華藏界
無僧不住寶池中平攀玉筍羣峰繞四圻雲根百道通
直怪登臨無侶伴獨隣絳漢友冥鴻

登北臺

臺名叶斗峯峯
下有龍翻峯

北峯直上不支藜側立中天景忽移獅子窟前晴雨暗
雁門關外朔風悲峯標叶斗凌高漢石被龍翻臥別陂
草樹未秋搖落盡無端遊思動淒其

送屠使君守辰州

弘灝

久向南閩轉餉優又乘五馬上辰州萬家表率稱方伯
千里專城屬郡侯帆綠漢陽江上樹草青鸚武水中洲
計君到日先逢夏一曲薰風足解憂

經沈嘉則先生殯所

圓復

三載頻經櫟社鄉，水雲撩亂慘無光。
令威一自乘仙馭，華表同誰弔夕陽。
社散十洲增寂寞，樓空八咏入淒涼。
當年樹檟知何事，衰艸離披漸損墻。

王公精舍晚步

性航

祇林薄草散輕霞，落葉蕭蕭亂晚鴉。
風冷漸令山骨瘦，月明贏得水容賒。
幾行樹植旃檀種，十畝蓮開優鉢華。
雁影忽過僧影靜，夜深香露滿袈裟。

同航公雨中還山

如安

曉靄宿霧昏秋山雙笠遥遥帶雨還石磴新穿別澗水
蓮峯初沐翠雲鬟香林唯鳥馴苔逕幽谷無人閑竹關
別去山中纔幾日便驚塵色已侵顏

季秋歸攝山寄白門栗徵父

法通

得歸蘭若赴雲山萬壑千巖一日還落日樵人歌自去
清秋山鳥語仍聞浮雲似愧身無繫晚菊還輸鬢早斑
遙想醉園森玉樹幾時回首亦高攀

病中答友人書

智證

不於淺落動孤吟奈此身
耽枕簟深夜月到窓虛對影
曉鶯啼處每驚心病欺弱骨
渾憑藥費乏黃金欲賣琴
蟲臂鼠肝隨化去漫勞書札問浮沉

過朱環宇居士江上居

讀徹

破屋臨川寒氣生人烟兩岸水光橫
聽鐘不過金山寺望月遙分鐵甕城
潮滿客船江口發夜深漁火樹頭明
小窓旅夢初回處無奈霜天畫角鳴

庚戌春暮漫書

文貞 二首

歌斜蓬戶未嘗開恐被閒人損綠苔
秋葉刺青春老去
柳花飛白晝長來經函防蠹常翻帙
茶竈增薪每熬灰
自笑吾生蕉餓幻不過滿腹又何哀

早夏憶雪嶠頭陀及谷響社兄

風熏梅李鼻交香猛憶良朋較日長
竹粉褪殘梢展綠
麥芒枯短穗含黃書排古籀蝸延壁
話破閒情燕坐梁
鵲臭布衫難自脫何當萍聚謾商量

清明後一日同周孝修賢悅可登胥山有感得悲

字

正勉
二首

翠微雙屐路逶迤共謁將軍覓斷碑
古墓無人栽檟樹荒林有鳥喚鴟夷
途窮尚想吹簫日子托曾甘賜劔時
已過禁烟吳楚俗梨花籍地晚風悲

詠慧雲禪房牡丹

早知仙種出羣芳故謝繁華近法堂
情斷御溝遼葉使品高初地占花王
不隨粉黛春生座獨伴琴書月轉廊
只恐鷓鴣頻喚雨飄零無袂襲天香

偶題

北邙

昨日事為今日夢醒時自笑醉時心何曾白髮畏豪傑
只有青天高古今乘興放歌千嶂月凭欄會意一聲禽
當爐不是無生策何必長門賦賣金

五言排律附

法華山房為敷竺曇賦

宗泐

山房白日靜政對五蓮峯援坐沼邊石鶴巢簷外松閒
門無客到深徑有雲封坐冷千林雨香殘半夜鍾道情

甘淡泊身計得從容莫戀一枝穩鳥飛無定踪

新柳

道衍

裊裊臨江郭依依傍苑牆
眼舒春後雪眉颯曉來霜
蠻舞腰爭細鶯遷色並黃
低垂連草帶亂拂和梅香
雨殢枝猶弱烟牽縷共長
隋隄千萬樹目斷意淒涼

和王適齋

如蘭

王師勤遠畧歇馬最深山
月黑猿啼樹風腥虎似關
暗泉流屋底落葉擁林間
鍔戟為農器荆釵飾女鬟
時清

烽燧息天闊野雲閒銅柱功成後長歌出塞還

海門看落日

慧秀

浩蕩陳胸次長江眺望豪水方三峽急雲佐兩峯高西
日驚浮動北風停怒號火光團赤旂空色闢紅濤浴彩
疑羣驚揚靈隱巨鰲寶輪義仲馭萍實楚人操圓象垂
垂入餘霞冉冉韜坐來天地黑蠻霧漲林皋

錢懋穀先生生日賦贈

斯學

升日迴春海連霞逗曉峯溪堂新罨畫江渚老芙蓉星

映真人德天開道者容盡看雙作鳳未數八為龍世界
情堪澹丘園趣亦濃鶯花題款款車馬笑憧憧石齒常
留屐山腰不借筇右軍方鄴水上客比臨邛采鞠偏多
藥餐芝更有松精修窮五臆碩學富三冬深竹藏幽閣
垂蘿蔽曲墉琅玕披簡帙琥珀上歌鐘陶遠林中社求
羊徑裡蹤半簾沙月小一榻水雲重詩好傳餘響文雄
入正宗徵書憑赫奕衣褐自蒙茸衆妙皆紛集羣賢總
過從清芬高仰止紫氣挹神丰才力君強健交心我拙

慵頌言將竺梵端只效華封

江禎生歸武林便寄虞長孺

如愚

時勢寡偕偶行藏詎遂心
纔因龍井別記得虎林深
子有遠遊志余多避世襟
溪寒石淺淺葉落雨陰陰
高枕忘窮達漫交信陸沉
才名誠翠羽談麈盡臬音
麝在臍應噬頭存鏡莫臨
幾曾知善惡何必辨輸金
明歲西湖柳虞翻差欲尋

寄贈松寥湛公

通潤

遙憶松寥閣亭亭江水中其人如白鶴御世若飄鴻雙
眼澄秋鏡孤懷敞素空尋花頻冒雨候月不辭風興到
書偏逸神來句自工寧知叔世裡尚有晉支公

悼公朗

通凡

朗公遷化後一榻蘚苔深車馬無來客雲霞有故林孤
鐘晨寂寞雙樹夜蕭森人誦生前偈燈傳結外心山寒
遺鳥夢水涸斷龍吟歲似文星墜光疑舍利沈門人知
痛哭朋好費招尋想像經行處長廊薜荔陰

結社徑山寄懷無期禪兄姑蘇

德彥

不須論法席相對總忘形
簾幙鉤天影菴居抱地靈
苔吞雙徑綠樹合五峯青
殿倚龍湫險雲生鳥道冥
身殘悽落木心曠任浮萍
過客陰廊偈先賢斷石銘
短筇花裏出飛瀑樹頭聽
宿霧時藏豹空潭夜聚星
柴門闕冷淡瓦鉢弄清泠
采菊多成句看松半掩經
逢人忘曲折行路畏伶仃
獨有吳門望時時上翠屏

弔簡公

方擇

此日五湖畔蕭然山寺門數行秋樹落千壑暮烟屯已
謝平生友空懷夙昔言洞雲淒以變塵榻儼猶存自我
甘棲息初君過討論溪頭幾寒暑林下共朝昏別去流
光速哀來墮淚繁陰堦生蔓草斜日慘荒原半篋書經
在那堪覩墨痕

春日偕汪明生米君夢郁伯承陸三孺陳宗閣范
長康耕牧隱赴岳水部儀部之招集閒齋限體得

圓字

正勉

良晤惜遲暮常懷伐木篇寄書虛鳥外攜錫慰花前地
似西園勝人逾鄴下賢夜珠含照乘星壁耿文天柳葉
嬌多態梅花瘦欲禪齒應羣彥後才得二難憐雲逼春
衣薄月隨歌扇圓還思賡郢曲刻燭緩鳴絃

七言排律附

秋華亭

良琦

片玉山西境絕偏秋華亭子最清妍三峯秀割崑崙石
一沼深通渤澥淵鸚鵡隔窓留客語芙蓉映水使人憐

桂叢舊賦淮南隱雪後嘗迴剡曲船北海樽中長潏澹
東山席上有嬋娟紫薇花照銀瓶酒玉樹人調錦瑟絃
醉過竹間風乍起吟行梧下月初懸一聲白鶴隨歸佩
何處重尋小有天

古今禪藻集卷二十五